



Հաստատված է  
ԳՊՀ գիտական խորհրդի  
2017թ. թիվ 10 նիստում  
Ռ. Խ. Հակոբյան  
«30» սեպտեմբերի 2017թ.

## ԳԱՎԱՌԻ ՊԵՏԱԿԱՆ ՀԱՄԱԼՍԱՐԱՆԻ ԷԹԻԿԱՅԻ ԿԱՆՈՆՆԵՐ

1. Սույն կանոնների նպատակն է սահմանել Գավառի պետական համալսարանում (այսուհետ՝ Համալսարան կամ ԳՊՀ) կիրառման ենթակա էթիկայի նորմերը՝ որպես Համալսարանի գործունեության համար կարևոր բարոյական կողմնորոշիչներ:
2. Էթիկայի կանոնները վերաբերում են Համալսարանի վարչական, պրոֆեսորադասախոսական, ուսումնասօժանդակ, տնտեսատեխնիկական անձնակազմերի անդամներին, ուսանողներին (այսուհետ՝ դերակատարներ), ովքեր այդ կանոնները պարտավոր են կիրառել միմյանց հետ հարաբերություններում, ինչպես նաև Համալսարանի արտաքին գործընկերների և հանրության հետ առնչություններում:
3. ԳՊՀ-ում գործող էթիկայի կանոնները ներառում են բարոյական սկզբունքներ և արժեքային կողմնորոշիչներ, որոնք նպաստում են Համալսարանի դերակատարների կողմից իրենց գործառույթների պատշաճ իրականացմանը, պարտավորությունների բարեխիղճ կատարմանը, ԳՊՀ-ի նկատմամբ հանրային վստահության ապահովմանը:
4. Համալսարանում կիրառվող էթիկայի սկզբունքներն են.
  - 1) բարեվարքություն,
  - 2) սոցիալական արդարություն,
  - 3) ժողովրդավարություն,
  - 4) քաղաքական զսպվածություն և չեզոքություն,
  - 5) ազնվություն,
  - 6) ճշմարտախոսություն,
  - 7) օբյեկտիվություն,
  - 8) անաչառություն,
  - 9) հաշվետվողականություն,
  - 10) թափանցիկություն,
  - 11) փոխադարձ հարգանք,
  - 12) փոխադարձ վստահություն,
  - 13) փոխադարձ ուշադրություն, հոգատարություն,



- 14) նվիրվածություն,
  - 15) բարեխղճություն,
  - 16) պատասխանատվություն:
5. Համալսարանում բոլոր դերակատարները պահպանում են բարեվարքության ընդհանուր նորմերը, սույն կանոնները, ինչպես նաև ԳՊՀ ակադեմիական ազնվության հայեցակարգում և ԳՊՀ հակակոռուպցիոն ռազմավարական ծրագրում սահմանված դրույթները:
  6. Համալսարանում ընդունված էթիկայի կանոն է ազնվությունը, ըստ որի դերակատարները պետք է խուսափեն անազնիվ վարքագծի ցանկացած դրսևորումից՝ խարդախությունից, ստախոսությունից, խաբեությունից, գողությունից, շորթումից, կաշառքի պահանջից, գրագողությունից, արտագրությունից, ակադեմիական ազնվության սկզբունքի այլ խախտումներից:
  7. Համալսարանում ցանկացած տիպի հաղորդակցության ընթացքում դերակատարները պարտավոր են պահպանել ճշմարտախոսության սկզբունքը՝ խուսափելով կեղծիքից, ստախոսությունից, փաստերի և իրավիճակների աղավաղումներից:
  8. Համալսարանում դերակատարների համար կարևոր էթիկական նորմ են սոցիալական արդարության սկզբունքը, բոլոր հարաբերություններում անկողմնակալության և անաչառության պահպանման պահանջները:
  9. Բոլոր ուսանողները և աշխատակիցները հավասար են օրենքի առջև և հավասարապես պաշտպանվում են օրենքով: Արտոնյալ կարգավիճակ որևէ ուսանողին կամ աշխատակցին վերապահելը, դերակատարների ոչ իրավահավասար փաստական վիճակ ստեղծելը՝ որպես էթիկայի կանոնների կոպիտ խախտում, արգելվում է:
  10. Համալսարանի դերակատարները գործում են ժողովրդավարության կանոններով, յուրաքանչյուրի ազատ խոսքը և կարծիքը հարգելու սկզբունքով:
  11. Համալսարանի բոլոր դերակատարները համալսարանում պահպանում են քաղաքական զսպվածություն և քաղաքական հարցերի նկատմամբ չեզոքության սկզբունքները:
  12. Համալսարանում բոլոր գործընթացներն իրականացվում են թափանցիկության սկզբունքով՝ որպես օրինական և ժողովրդավարական գործունեության պարտադիր պայման:
  13. ԳՊՀ-ում գործում են հաշվետվողականության կառուցակարգեր, որոնց միջոցով ապահովվում է Համալսարանի գործունեության մշտադիտարկումը, արդյունքների վերլուծությունը, ուժեղ և թույլ կողմերի վերհանումը,



վերլուծությունների կատարումը, դրանց հրապարակումը և բարելավումների իրականացումը:

14. Համալսարանում իրականացվող բոլոր գործընթացները կանոնակարգված են համապատասխան իրավական ակտերով՝ կամային և անկանխատեսելի վարքագծի դրսևորումներից խուսափելու, սուբյեկտիվ որոշումների կայացումը կանխելու նպատակով:
15. Համալսարանի աշխատակիցները սահմանված կարգով ապահովում են աշխատանքային պայմանագրերում նախատեսված համապատասխան գործառույթների իրականացումը: Գործառույթների կրկնությունը բացառելու, պարտականություններից խուսափում թույլ չտալու, պաշտոնական դիրքի չարաշահումները և լիազորությունների վերազանցումները կանխելու նպատակով աշխատակիցները դիմում են Համալսարանի ռեկտորին:
16. ԳՊՀ ուսանողների գիտելիքները դասախոսների կողմից գնահատվում են օբյեկտիվության սկզբունքով՝ որպես սոցիալական արդարության ապահովման կարևոր պայման: Սոցիալական արդարության և օբյեկտիվության սկզբունքներով է գնահատվում նաև ԳՊՀ աշխատակիցների գործունեությունը:
17. Համալսարանի բոլոր դերակատարներն առաջնորդվում են փոխադարձ հարգանքի կանոնով՝ գերծ մնալով որևէ մեկի նկատմամբ սպառնալիք, թշնամանք, ատելություն, վիրավորանք դրսևորելուց: Այն ներառում է հարգանքը միմյանց հայացքների, գաղափարների, դիրքորոշումների, ֆիզիկական և հոգեբանական անձեռնմխելության և այլ արժեքների նկատմամբ:
18. Համալսարանում դերակատարները պահպանում են փոխադարձ վստահության կանոնը՝ որպես արդյունավետ համագործակցության անհրաժեշտ պայման, աշխատանքի հաջողության գրավական:
19. Համալսարանի դերակատարները պահպանում են փոխադարձ ուշադրության և հոգատարության կանոնները՝ որպես առողջ բարոյահոգեբանական մթնոլորտի և արդյունավետ թիմային աշխատանքի պարտադիր պայման:
20. ԳՊՀ բոլոր դերակատարները պարտավոր են միմյանց նկատմամբ վարվել ազնվորեն և անաչառ կերպով, առանց կողմնակալության և վարքի անազնիվ դրսևորումների ապահովել ներգրավվածություն ընդհանուր գործում:
21. ԳՊՀ-ում կարևորվում են դերակատարների բարեխղճությունը և նվիրվածությունը գործին, ազնիվ, օբյեկտիվ և կոռուպցիայից գերծ առաջնորդությունն ու ակտիվ մասնակցությունը ԳՊՀ խնդիրների լուծմանը:
22. Համալսարանի բոլոր դերակատարները պատասխանատվություն են կրում միմյանց, արտաքին գործընկերների և հանրության առջև՝ իրենց գործառույթները պատշաճ կատարելու համար:
23. Համալսարանի բոլոր դերակատարները պարտավոր են դրսևորել բարոյական վարվելակերպ՝ միմյանց նկատմամբ վերաբերելով առանց խտրականության՝ կապված անձանց սոցիալական վիճակի, ծագման, գույքային դրության, սեռի,



քաղաքական կամ այլ հայացքների, հաշմանդամության, դավանանքի և այլ հանգամանքների հետ:

24. Համալսարանի դերակատարները պարտավորվում են ձեռնպահ մնալ որևէ հանձնարարություն և խնդրանք կատարելուց, որոնք չեն բխում օրենսփյոց, Համալսարանի կանոնադրությունից և դեմ են ԳՊՀ շահին:
25. Համալսարանի որևէ մարմնում հարց քննարկելիս, որը վերաբերում է ԳՊՀ աշխատակազմի անդամների անձնական շահին կամ նրա մերձավոր ազգականի շահին, տվյալ անդամը պարտավոր է հրաժարվել հարցի քննարկմանը մասնակցելուց:
26. Համալսարանի դերակատարներն իրավունք չունեն պահանջել կամ ընդունել կաշառք, կամ նյութական ծառայություն, ստանալ որևէ անձնական օգուտ՝ իրենց ծառայողական պարտականությունների կատարման կամ այդ պարտականությունների կատարումից ձեռնպահ մնալու դիմաց:
27. Համալսարանի դերակատարները պարտավոր են անմիջապես հայտնել ԳՊՀ ռեկտորին կամ համապատասխան մարմիններին կաշառք առաջարկելու ցանկացած փորձի մասին:
28. ԳՊՀ ֆինանսական կառավարումը, գնման և այլ տնտեսական գործընթացներն իրականացվում են օրինականության, արդարության, ազնվության, թափանցիկության սկզբունքներով:
29. Համալսարանի դերակատարները պարտավոր են խնայողաբար վերաբերել ԳՊՀ գույքին, նյութական ռեսուրսներին և դրանք չօգտագործել անձնական նպատակների կամ շահ ստանալու համար:
30. Համալսարանի էթիկայի կանոնները, ԳՊՀ հակակոռուպցիոն ռազմավարական ծրագրի դրույթները և ԳՊՀ ակադեմիական ազնվության հայեցակարգի պահանջները խախտած անձինք սահմանված կարգով ենթարկվում են կարգապահական և վարչական պատասխանատվության: